





Dals set umens ch'èn stads il 1865 sco emprims sin il piz dal Matterhorn èn sa disgraziads quatter da turnar enavos.



Anc lunsch viadent en il 20avel tschientaner èn ils alpinists ids siadora cun chalzers enguttads (museum alpin Zermatt).



Pervi da sia furma speziala e damai ch'il Matterhorn è vesavel lunsch enturn è el daventà uschè renumà sin l'entir mund.

# Matterhorn – c'est le Seigneur

La statua da libertad da la Svizra è in fenomen ch'attira l'entir mund

DA CLAUDIA CADRUVI / ANR

■ Il Matterhorn datti dapertut. Sin tschigulattas, stgatlats da colurs en comics e films. El saja l'object il pli savens fotografà da quest mund, vegn magari pretendi. Giapunais vegnan a Zermatt per maridar sut il grip maie-stus. Quai ch'è per l'America la statua da libertad, è il Matterhorn per la Svizra. Il cudesch «Matterhorn – eine Besichtigung» emprova da tschiffar il fenomen dal pli renumà culm da noss pajais.

## Dar giu il pass en chamona

«Sch'i fa mal'aura na dedesta el nagin. El fiss gea era responsabel per in accident, sch'el clamass la glieud da mal'aura, di il guardiamona. Igl è las tschintg la damaun ed intgins runcan pruamain vinavant sin lur matratscha. Auters levàn, fan solver. In di 'Jau fatsch quai era senza ensolver.» L'emprim chapitel cumenza cun l'atmosfera en la chamona dal Matterhorn. Ils trais auturs dal cudesch han observà intgins dis ils alpinists che vegnan da lunsch e da manaivel.

En la media datti mintg'onn trais morts al Matterhorn, il pli savens al

Hörnligrad. Sch'ins vul ir sin il piz datt'ins giu en la chamona il pass u la carta d'identad. Uschia ha il guardiamona la controlla. Sch'insatgi na turna betg, «van ins suenter a la chaussa, però pir suenter trais dis». E daco vul tanta glieud ir sin quest culm? El na tutga betg tar ils pli auts? «Quai è in culm ch'ins na dastga betg laschar ora.»

## La tema davos la curascha

Anc adina en chamona: «La stanza è stgira, la luna plitost deprimida, tut spetga, i regia tsiun. Tge datti damaun? Ils ins raquintan aventuras alpinisticas sco per appellar a l'atgna curascha. Auters reptan ad in repeter ils detagls da la ruta dal proxim di. Puspè auters eviteschan il tema Matterhorn sco sche la menziun dal grippun davos la chamona purtass discletg.» E lura èsi serius. I va liber. Ils alpinists partan e turnan enavos. In gia suenter ina mes'ura. Inqualin suenter ch'el ha cuntanschi ils cunfins da sias forzas. Ed auters suenter bleras uras – cun fatschas cuntentas. Els èn stads sin il piz.

In alpinist ch'è stà si, descenda anc il medem di vers Zermatt. Cura ch'el arriva la notg en il vitg è il davos tren gia parti. Perquai ch'el vul spargnar ils da-



Abstrahà da la ruta normala è il Matterhorn alpinisticamain in culm fitg preten-siuns.

ners per il taxi, va el anc a pe fin Täsch, nua ch'el ha parcà ses auto.

## L'emprima dunna sin il Matterhorn

En la part alpinistica dal cudesch s'exprima Oswald Oelz, medi ed expert per mal-sognas d'atezza, davart ils blers accidents sin il Matterhorn. «Tuts culms enconuschents dal mund tiran natiers glieud che na tutga betg sin ils culms. I dat blers che vegnan a l'absolut cunfin da lur forzas sin il Matterhorn, ma els èn per il rest da lur vita cuntents d'avair fatg quai.» La rashun principala per ils accidents saja la surtaxaziun da las atgnas forzas.

Ina persuna che vegn da calcular fitg bain sias forzas è Yvette Vaucher. Oz ha ella pli che settant'onn. Exact 100 onns suenter ch'els emprims alpinists han cuntanschi l'emprima giada il piz dal Matterhorn, è ella, sco emprima dunna, era raivada sin il piz. Quai è stà il 1965.

Senza che las medias avessan preni notizia, è ella partida cun ses um ed in ami. Ella n'eria betg agitada. La saira en il grip ha ella laschà crudar il satg da bivac. Tuttina descriva ella la notg en la costa dal nord sco insatge bel. «Perkletg n'avevi nagin vent, igl era fitg cler, e quai era unic e bel, ins vesiva la sumbriva dal


Matterhorn giu sin il glatscher.» Mintga culm saja unic, ma il Matterhorn saja «le Seigneur» da tut ils culms, di Vaucher.

## Il Matterhorn en l'univers

La part culturala dal cudesch è prest uschè gronda sco la part alpinistica. I sumeglia in pau ina raccolta da curiositads. Uschia ha p. ex. Claude Nicollier, l'emprim ed unic astronaut da la Svizra, preni cun sai in maletg dal Matterhorn cura ch'el è parti l'emprima giada en l'univers.

Per geologs è il Matterhorn dal reminent in toc d'in continent ester. Ina restanza africana numnadamain, ch'è restada enavos sin la platta europeica cura che lezza è colliada cun la platta africana avant 90 milliuns onns. Ma era sch'il grip è ina restanza africana, vegn el duvrà savens en la reclama sco simbol per qualitat svizra. Sin la stgatta da colurs da Caran d'Ache paradescha il Matterhorn gia dapi decennis. Ma era firmas da l'exteriur sa nuspeschan betg da duvrar il culm per lur intents.

Michael T. Glanz, Marc Valence, Heinz Dieter Fink: Matterhorn, Eine Besichtigung. WerdVerlag, 160 paginas. Pretsch 59 francs. Turitg, 2001.



Walt Disney, «Weisses Gold vom Matterhorn».



3 bernardins, 6 bandieras svizras e 23 fatschas che rian per la camera davant il Matterhorn.